

欽定大清會典事例

欽定大清會典事例卷七百十

兵部

軍器

盔甲之制
給發軍器

弓箭之制

旗幟之制

盔甲之制。○原定。凡盔制以鐵二片製如帽形。上銳下平。合而成之曰盔。即兜鍪高五寸。圍圓一

尺九寸。其合縫處壓以鐵梁曰盔梁。盔前安鐵

一片曰遮眉。闊寸餘。圍長七寸。其上覆鐵檐一

其形如蓋曰舞擊。闊六分。長四寸三分。其下曰

護額。為覆碗於盔上。其上仰者曰盔碗。徑一寸

六分。高一寸二分。圍圓五寸。安管一。長二寸。圍

圓一寸。以插盔槍。

俗名狀
帽頂

槍長三寸六分。上為

盤。以垂髦。安頂。頂各有品制。垂於項後者曰護
項。垂於兩耳者曰護耳。護耳之下曰護頸。其表
官用錦緞。或施綵繡。兵用布。無定式。傳以鐵葉。
護項用鐵葉九。護耳二。用鐵葉各六。護頸同。甲
制。上衣下裳。甲衣長二尺二寸。下廣一尺一寸。
護肩二。各長一尺一寸。廣一尺三寸。袖二。各長
一尺二寸。上圓圓一尺二寸。下圓圓九寸。護腋
二。各長一尺。上廣九寸。凹其中以承腋。其末銳。
遮襦一。方八寸。左襦一。方六寸。甲裳長二尺六

寸。幅二。每幅上廣一尺二寸。下廣一尺五寸。其表官用錦緞施綵繡。兵用布。無定式。甲衣用鐵葉一百三十六。每葉長二寸五分。廣二寸。甲裳用鐵葉一百一十六。護肩甲袖護腋。遮襠左襠均用小鐵葉。長一寸六分。廣一寸四分。步兵甲衣長二尺。甲裳長二尺六寸。間有無裳者。餘同。

○順治十七年議准。親王郡王盔用起花金頂。嵌綠松石珊瑚寶石者聽。不得擅用東珠。下垂熏貂二十四條為髦。貝勒貝子盔起花金頂。髦同。八八分公盔插蜜鼠尾。領侍衛內大臣都統

盔插鵬翎二。作燕翦形。均垂貂尾十條為髦。內大臣及在內行走之公侯伯和碩額駙郡主額駙散秩大臣。盔均插蜜鼠尾。垂朱髦。隨旗行走之公侯伯統領副都統。盔均插熏獺尾。垂朱髦。上三旗侍衛鑾儀衛官。盔插豹尾。下五旗王府長史護衛典儀。盔插猓獾尾。垂朱髦。王府長史垂黑髦。前鋒護軍營參領副參領侍衛。盔插獺尾。垂黑髦。前鋒校護軍校。驍騎校。前鋒護軍。均鐵頂。垂朱髦。驍騎營參領以下官。盔插獺尾。垂朱髦。領催馬甲。均垂黑髦。凡鐵頂各旗異制。

以示別。○康熙五年題准八旗前鋒校護軍校
甲以白緞為表。前鋒護軍繡甲。藍布為表。侍衛
護衛前鋒護軍甲及裳均施鐵葉於外曰明甲。
八旗馬甲甲繡布為表。各如本旗之色。○又定。
直省督撫提鎮盔插鵬翎。垂貂尾。副將參將以
下盔插獼尾。垂朱髦。馬步兵盔槍鐵頂朱髦。製
甲之式與八旗同。○又定。鎮國將軍軍輔國將軍
奉國將軍奉恩將軍甲胄均視一品。○雍正十
一年奏准。官員盔甲區為三等。一二品官為一
等。盔之護項護身護頸甲衣前後甲裳左右護

肩護腋。遮襠左襠。共繡團蟒十有五。三品至五品官為二等。繡團蟒十有一。護腋及遮襠左襠不繡。六品至八品官為三等。甲衣甲裳護肩繡團蟒六。餘皆不繡。按等定價。令工部製造。○乾隆二十一年。

欽定棉胄制。以革髹漆。頂植銅葉。護項護耳。護頸均敷棉。護軍校護軍前鋒垂紅纓。護項以下石青色。驍騎校馬甲鹿角兵。礮兵垂黑纓。護項以下各從旗色。甲亦敷棉。護軍校驍騎校前鋒護軍均全身。馬甲無左右袖。鹿角兵礮兵無裳及左右

袖左襠。色如胄制。官綺表紬裏。外布黃銅釘鍍金。兵紬表布裏。外布白銅釘鍍銀。○又奏准八旗額設鐵盔鐵甲。將三分之一改造棉甲二萬件。收儲備用。另造不用鐵葉紬面金釘盔甲一萬八千餘副。以備

大閱合操之用。○又奏准熱河盔甲。照京城之例。改造棉甲三分之一。以資實濟。各省標營盔甲。畫一辦理。○二十三年奏定。兩翼前鋒統領護軍統領。胄頂均植鵬翎二。垂貂尾。○又定。胄頂垂熏貂纓。親王。郡王。均十有八。貝勒。貝子。均十有

四。○又定。直省總兵。胄頂植熏獾尾。垂紅纓。副將植獾尾。均繡蟒五。參將以下亦植獾尾。不施繡。○又定。固倫額駙。和碩額駙。郡主額駙。縣主額駙。郡君額駙。縣君額駙。鄉君額駙。子男。甲胄。各視其品所應得。與冠服同。○又定。甲絛。親王。郡王。用金黃色。貝勒以下用石青色。與冠服同。○又定。武狀元盔。高一尺三寸。盔椗高六寸。上圍圓五寸八分。下圍圓二尺一寸。上安盔梁。盔椗鳳頭。鳳頸。鳳翅。鳳尾。均用黃銅。平面釵花兩邊安頂。護耳。護頸。盔尾。裏用紅絨。外用紅布。內

襯白布。周圍大紅片金鑲邊。外釘銅葉。甲褂長三尺九寸。肩高七寸六分。腰一尺五分。下廣一尺六寸。結紅綠絲絛八十箇。袖二。長二尺。上圍圓一尺五寸。下圍圓九寸五分。裏用大紅潞紬。外用紅布。內襯白布。周圍大紅片金鑲邊。外傳銅葉。

弓箭之制。○原定。弓胎用榆木。鑲楸木。南方或削巨竹為之。取材之法。視竹木之理。平正端直。張而不跛。胎長三尺七寸。其面傳以牛角。背加筋膠。外飾樺皮。胎一而角兩接。接處用鹿角。

一塊固以筋膠。加煖木皮於外曰弓靶。兩弣以桑木為之。各長六寸三分。鑲以牛角。刻鏤其末。以受弦。弣與胎鬬筭相接處。光削一面。以鹿角為方。釘於角端曰墊弦。弓弦有二。一曰纏弦。用蠶絲二十餘莖為骨。外用絲綫橫纏以束之。纏綫分三節。隔七寸許。空一二分不纏。則不張弓時可摺疊收之。一曰皮弦。剪鹿皮為之。用於戰陣。弓力強弱。視胎面厚薄筋膠之輕重為斷。一力至三力。用筋八兩膠五兩。四力至六力。用筋十四兩膠七兩。七力至九力。用筋十八兩膠

九兩。十力至十二力。用筋一斤十兩膠十兩。十三力至十五力。用筋二斤膠十二兩。十六力至十八力。用筋二斤六兩膠十四兩。箭筈以楊木柳木樺木為質。取圓直之幹削成之。別用數寸之木刻槽一道曰箭端。箭筈必取範於端。以均停其首尾。刻銜口以駕弦曰括。其端受鏃。凡鏃治鐵為之。曰鈇箭。曰梅針。皆戰箭。施於教閱者曰髀箭。以寸木空中錐眼為竅。矢發則受風而鳴。又謂之響箭。鐵鏃上加骨角小哨者曰鳴鏃。黏羽翎於箭括曰箭羽。○順治二年題准。每年

秋季於昌平密雲二處採弓胎弓梢萬副需用
樺皮於甯古塔採取令司弓一人率每旗弓匠
長各一名弓匠各二名前往驗採。又定兵部
設箭匠十名以造官箭。八旗每佐領下設弓匠
一名製造官箭。○康熙六年題准官弓交八旗
司弓製造採伐弓胎於八旗內選司弓一人每
旗弓匠長一人弓匠十名各乘官馬領四十日
行糧每年採弓胎弓梢五千二百副武備院選
二千副每旗給四百副以備製造官弓之用令
鄰近驛站備車運送至京其採取弓胎如不敷

用。具奏增採甯古塔將軍隔一年選委官兵。採
取樺皮七萬二千二百張以備用。○又題准。製
造官弓。係軍前應用者。由部選取委官解送各
省支取者。由各該處委官同該旗司弓等選給。
至直省督撫提鎮駐防將軍都統副都統及武
狀元等應賞給官弓。均由部行文八旗領取給
發。○十九年題准。造箭務要箭心堅長。手鑽安
釘。如草率造作。將匠役治罪。○又議准。匠役製
造弓箭。擅改式樣。售賣者。鞭五十。所造之物入
官。○雍正五年議准。青鶴翎一等每箭五枝。價

銀一兩八錢。二等一兩六錢。三等一兩四錢。蟬
鷺翎一等每箭五枝。價一兩七錢。二等一兩五
錢。三等一兩三錢。鷓鴣翎一等每箭五枝。價一
兩四錢。二等一兩三錢。三等一兩。鵲翎一等每
箭五枝。價一兩。二等八錢。鵝翎一等每箭五枝。
價七錢。二等六錢。芝蔴鵬戰箭。每百枝價八兩。
鴈翎每百枝價五兩。定價之後。鋪戶有任意高
擡時價者。照把持行市律治罪。○乾隆三十七
年奏准。張家口賽勒烏蘇軍臺弓箭。每屆三年
報部修理一次。每弓一張。銷銀二錢。每箭一枝。

銷銀一分。○又奏准採取弓胎。如所用有餘。隔年採取。○又奏准吉林將軍隔一年派撥官兵採取樺皮三萬張送部。內五千張進

上。一萬張交武備院。一萬五千張交下五旗。每旗三千張備用。○嘉慶八年奏准各省守禦行軍弓箭准銷價值。直隸弓每張價銀一兩五錢。大箭每枝價銀四分。戰箭每枝價銀三分。江南。江西弓每張價銀九錢五分。撒袋箭每副十九枝。價銀五錢四分。哨船餘箭每枝價銀二分五釐。戰箭每枝價銀二分。河南。山東弓每張價銀一兩

五分。戰箭每枝價銀三分。山西弓每張價銀一兩五分。戰箭每枝價銀二分二釐五毫。靶箭每枝價銀三分。大箭每枝價銀八分五釐。浙江弓每張價銀一兩五分。箭每枝價銀三分。乍浦滿營弓每張價銀一兩二錢七分。箭每枝價銀三分四釐。福建弓每張價銀一兩九釐。小箭弓每張價銀七錢五分六釐。戰箭每枝價銀二分三釐八毫。陝西甘肅弓每張價銀一兩一錢三分。長鉏箭每枝價銀六分。鴨嘴箭每枝價銀三分五釐。戰箭每枝價銀三分四釐。四川弓每張價

銀一兩二錢六分三釐七毫。戰箭每枝價銀三分五釐。廣東弓每張價銀一兩五分。戰箭每枝價銀二分二釐。大鈇箭每枝價銀三分。撒袋箭每副十三枝。價銀二錢一分。廣西弓每張價銀八錢。戰箭每枝價銀一分二釐。湖南弓每張價銀一兩五分。戰箭每枝價銀二分。湖北弓每張價銀一兩五分。戰箭每枝價銀二分六釐九絲六忽八微七塵。撒袋箭每副十八枝。價銀三錢五分。雲南弓每張價銀一兩五分。戰箭每枝價銀三分。弩弓每張價銀一錢四分五釐八毫四

絲鐵弩箭每枝價銀六釐。竹弩箭每枝價銀二釐。弩弓弦每條價銀四分三釐。弩箭筒每箇價銀二錢四分五釐一毫八絲。弩箭匣每箇價銀二錢一分五釐七毫八絲。貴州弓每張價銀一兩五分。戰箭每枝價銀三分。○又定伊犁駐防戰箭每枝價銀五分。

旗幟之制。原定八旗旗幟各以本旗之色為辨。滿洲都統幟方幅。惟鑲黃鑲白鑲紅鑲藍左幅稍銳。各長五尺七寸。廣五尺。繪龍竿長一丈二尺。鐵頂朱髦。惟正紅旗用黑髦。蒙古漢軍都

統纛同。佐領纛方幅。長四尺二寸。廣五尺。不繪綵。竿長一丈一尺。髦頭色黑。領催小旗長一尺五寸。廣一尺八寸。竿長五尺。八旗同式。而鐵頂各異其制以示別。護軍營纛各如本旗之色。裁方幅為三角。邊作火鋸形。直長五尺五寸。斜長七尺三寸。繪龍。竿長一丈二尺。鐵頂朱髦。惟正紅旗用黑髦。護軍校小旗三角。直長一尺二寸。斜長二尺三寸。竿長五尺五寸。八旗同式。而鐵頂各異其制以示別。前鋒營旗方幅。長二尺三寸。廣一尺八寸。繪飛虎。竿長六尺。頂插豹尾。髦

頭色赤。火器營旗纛。護軍驍騎。各如其本營之式。均加白號帶以別之。健銳營旗纛。左翼鑲黃右翼正黃均方幅加號帶。直省標營大纛。裁方幅為三角。直長五尺八寸。斜長一丈。邊作火燄形。或繪雲蟒。或繪飛熊。隨地異制。無定式。鐵頂朱髦。什長旗三角。直長二尺三寸有奇。斜長三尺八寸。邊作火燄形。鐵頂朱髦。此外有先鋒旗。督陣旗。門旗。令旗。稟事旗。均隨營異制。凡督撫提鎮大帥旗。以黃布為之。方幅廣一丈八寸。長一丈四尺。兩面大書帥字。號帶一。長一丈五尺。廣一尺。竿長一丈。

六尺刻木葫蘆為頂。○乾隆十七年奏准旗幟
係兵丁所瞻視舊制各省將軍都統副都統補
授時即照其人本旗旗色由工部造給如有改
授即為更換不惟繫穴且於瞻視亦無準則嗣
後各省將軍都統副都統分定鑲黃正黃正白
三旗旗色。

盛京西安江甯綏遠城將軍天津副都統熱河副

都統皆用鑲黃旗色。

天津副都統乾隆三十二年裁

吉林甯夏

青州杭州福州將軍歸化城右翼都統山海關
副都統皆用正黃旗色黑龍江涼州廣州荊州

將軍歸化城左翼都統。成都副都統。皆用正白旗色。其各將軍都統兼轄之副都統。各視將軍都統旗色。○又定伊犁將軍。察哈爾都統。均用鑲黃旗色。察哈爾副都統。右翼用正黃旗色。左翼用正白旗色。○二十六年議准。青州將軍改為副都統。用正黃旗色。○又議准。歸化城左右翼都統裁汰。改設副都統一員。用正黃旗色。○又議准。成都副都統改為將軍。用正白旗色。○又議准。涼州將軍改為副都統。用正白旗色。○三十二年議准。察哈爾裁汰都統二員。改設副

都統一員。駐張家口。用正黃旗色。○四十五年
議准。密雲縣設副都統一員。用正白旗色。○光
緒十三年奏准。駐藏大臣用正白旗色。

給發軍器。○順治五年題准。馬兵每名各給甲
一。胄一。撒袋一。弓一。箭四十。腰刀一。步兵每名
各給甲一。胄一。腰刀一。其步兵弓箭兵各給弓
一。箭三十。長槍兵各給長槍一。鳥槍兵各給鳥
槍一。直省兵丁器械。照此例給發。○康熙六年
題准。八旗世爵暨文武官。各備甲一。胄一。弓二。
撒袋一。腰刀一。其箭數視品秩之大小以定等

差公五百五十。侯五百。伯四百五十。子四百。男三百五十。輕車都尉二百五十。騎都尉二百。雲騎尉一百五十。武官一品至五品。視子男以下至雲騎尉。六品以下官均一百。文職一二品與子男同。三品京堂視武職二品官例。四品京堂科道郎中視三品官例。員外郎視四品官例。營兵護軍前鋒領催各七十。馬甲各五十。世爵中官大於爵者。照官職箭數。爵大於官者。照世爵箭數。直省督撫提鎮及武職副將參將以下官。應備弓矢甲冑。各按品級定數。與八旗武職同。

○三十年。設八旗火器營。每佐領下設鳥槍前鋒一名。鳥槍護軍三名。鳥槍兵四名。每名各給鳥槍一杆。滿洲八旗。每旗各設子母礮五位。其餘大小銅鐵礮位。均分存於漢軍八旗礮局內。鑄造槍礮見工部○又定。八旗護軍營驍騎營。每佐領

下護軍二名。合給長槍一杆。馬甲二名。合給長槍一杆。八旗護軍營。每旗各設海螺三十有六。前槍營左右翼各設海螺八。火器營八旗。每旗設隨礮海螺各五。八旗鳥槍護軍鳥槍兵。海螺每旗各十有四。驍騎營每佐領下。各設海螺一。

每參領下。各設海螺二。漢軍鳥槍營。每旗設鼓一。金五。礮營。每旗設鼓一。金五。藤牌營。每旗設海螺各五。每旗設藤牌兵一百名。每名各給藤牌一。刷刀一。每旗設挑刀兵五十名。各給挑刀一。漢軍八旗。每佐領下。各設鹿角一架。連耜棍四副。每鹿角一架。設棉甲兵四名。每名給連耜棍各一副。○又定八旗京城各門及直省標營存儲火藥。防範宜嚴。令該管大員揀選所屬賢員率兵守護。○五十六年。覆准福建省舊有城寨之處。准設立礮臺。○雍正五年。

諭各處營伍所習武藝所用器械操演隊伍向來原無一定之例是以武弁到任往往以己所好尚及素所熟習者操演所屬兵丁間或學習未久而接任官又別有意見將從前所習者更改調換是兵丁之技藝每視該上司之去留以為轉移非訓練專精之道也凡事久則熟熟則生巧宜令各省將軍督撫提鎮因地制宜酌定規制永遠遵奉除騎射最為緊要天下通行學習外其餘各種演習悉著該上司會同通省官弁細心斟酌應如何操練用何軍器詳悉定議奏聞令各營永遠遵行接任官不得擅自更改儻將來

有應行變通之處。著具題請旨。如此則兵丁各精其業。且使一省之中。彼此畫一。將來或有調遣會集之處。正可相資為用。於訓練營伍大有裨益。○又

諭。自雍正三四年以來。外省將軍督撫提鎮等共有十數處。奏請於該地方添設子母礮位。經議政王大臣及兵部議准添設。朕已允行。昨閱看

聖祖仁皇帝康熙五十四年實錄內載山西總兵官金國正疏稱。臣標下向無子母礮。今願捐造二十二位。分給各營操演。

上諭大學士等曰。子母礮係八旗火器。各省概造。斷乎

不可。前師懿德馬見伯曾經奏請。朕俱不許。此乃

皇考當日所降諭旨。必另有

聖意。朕固不知曾有此

旨。故因外臣之請。廷臣之議。遂爾准行。其議政王大臣
中新任事者。自不知從前之例。其年久者或因日遠
遺忘。或知有舊事而不肯直言。均未可定。今既已錯
誤。應如何辦理之處。著議政王大臣定議具奏。欽此。
遵

旨議定。各省每兵千名。原設立威遠礮四位。子母礮六

位。今除

盛京吉林黑龍江三處子母礮百位。照舊設立外。其餘直省子母礮。盡行解部。別製衝擊便利之礮。總以兵千名設立礮十位之數為準。再沿海沿邊及水師戰船並直省守護城池緊要隘口之礮。仍舊存留。至小口戍兵無多。礮應撤回存儲。督撫提鎮駐紮地方庫內。遇有需用。臨時酌發。○又議准官兵所用軍需內鳥槍一項。能衝銳折堅。最為便利。如腹內省分。地勢平坦。利用弓矢。至沿邊沿海省分。山深林密。利用鳥槍。應將腹內省分。每兵千名。設鳥槍三百杆。沿邊沿

海省分。每兵千名。設鳥槍四百杆。該管官弁務須操演純熟。該提鎮不時考驗。如並不精練。將該管官弁題參。○又議准。山東省各鎮協營應用軍器。如大礮。鳥槍。弓箭。長槍。藤牌。大刀。均係各營通設之械。每兵百名。分作十分。鳥槍五分。弓箭三分。藤牌一分。長槍一分。此外別設礮兵。專演礮位。均令依法操演。不得擅為更換。○又議准。河南省滿漢各營軍器。駐防八旗兵。設有馬步弓箭兵。鳥槍兵。子母礮兵。長槍兵。督標左右兩營。設有馬步弓箭兵。鳥槍兵。藤牌兵。礮兵。

大刀兵。河北鎮標九營。各設有馬步弓箭兵。鳥槍兵。礮兵。護礮刷刀兵。南陽鎮七營。各設有馬步弓箭兵。鳥槍兵。礮兵。護礮刷刀兵。藤牌兵。各營軍器。雖有無不同。而緊要通行者。已無不備。仍令永遠演習。不得更換。○六年議准。直隸省各營器械。弓箭礮位。鳥槍及三眼槍。大刀長槍。藤牌之屬。均隨時演習。但地勢之險夷不同。軍器之利用各別。除騎射。鳥槍礮位。永遠畫一演習外。至藤牌。於宣化鎮。平陽之地。最利。應以該鎮向設之三眼槍。大刀長槍。改換藤牌。紫荆關。

鳥槍甚少。應以該鎮向設之大刀改換鳥槍。其餘仍按舊設軍器。勤加訓練。○又議准。晉省多崇岡峻嶺。地屬沿邊。每兵百名。分作十分。以四分演習鳥槍。六分演習弓箭。別設礮兵。專演大礮。惟殺虎協舊有藤牌兵三百名。仍令演習。其餘刷刀長槍之屬。悉令改為鳥槍弓箭。永遠畫一演習。以期熟練。○又議准。江南江西水師各營所用軍器。槍礮弓箭之外。如大刀藤牌鉤鐮槍。過船槍。鉞斧。標鐵彈之屬。均為水師營利用之器。毋庸議改。其陸路各營。有設三眼銃長槍。

而無藤牌者。按三眼銃不能致遠。長槍遇險狹之地不能旋轉任意。應將三眼銃改為鳥槍。長槍改為藤牌。俾器械畫一。永遠遵奉操演。又議准福建省陸路各營。每兵千名。分為二十隊。馬上弓箭兵四隊。步下弓箭兵二隊。鳥槍兵十隊。礮兵一隊。藤牌兵一隊。大刀兵一隊。長槍兵一隊。各營兵數多寡不齊。照此遞為增減。水師戰船。大趕繒船設兵八十名。排槍四十二杆。中趕繒船設兵六十名。排槍三十杆。小趕繒船設兵五十名。排槍二十五杆。大艍船設兵三十五

名。排槍一十六杆。中艍船設兵三十名。排槍一十四杆。小艍船設兵二十名。排槍十杆。仍各備火藥彈子火礮火箭之屬。以資利用。○又議准浙江省各營。每兵千名。分為二十隊。礮位為一隊。長槍五十為一隊。鳥槍四百為八隊。弓箭三百副為六隊。藤牌一百為二隊。剗刀一百為二隊。永遠遵奉操演。○七年議准陝西四川二省各營兵丁。除礮位鳥槍弓箭通行演習外。其馬上弓箭兵兼習槍棒。守兵兼習剗刀。藤牌令提標守兵二百名專習。○又議准廣東省各協營。

每兵一百名內。分為弓箭二十名。兼習雙刀長槍。鳥槍五十名。藤牌十名。挑刀十名。礮兵十名。永遠畫一演習。○又議准滇黔粵三省各營。每兵千名內。以一百名操演大礮。兼習牌刀。以六百名習鳥槍。以二百名習弓箭。以一百名習藤牌。其不足千名營分。亦照此數遞減分派。○十年議准。閩省水路海面遼闊。陸路山深菁密。鳥槍一項。最為利用。於定例每兵千名內。設鳥槍四百之外。再增鳥槍一百杆。○十二年議准。火藥關繫緊要。必須豫備。方為有益。督撫提鎮將

所轄各營酌量每年應用之數。動公費製造。潮
溼地方。豫備三年。高燥地方。豫備五年。加謹收
儲。每年所用火藥。即於收儲數內動支。仍照動
支數目製造儲庫。出陳易新。按年造冊報部。該
管官如遇升遷。事故離任。照倉庫錢糧例交代。
若有虧缺及不堪應用者。責令專管官賠補。仍
罰俸一年。該管上司罰俸六月。○乾隆五年議
准。滇黔二省地方。山箐陰雨不常。弓箭一遇潮
溼之時。險仄之地。不能應手施展。惟弩弓以木
為質。其力最勁。為行軍之利器。令弓箭兵各兼

習弩弓。以資利用。○十一年議准。兵丁操演所
需鉛彈火藥火繩。應動用公費。但各營動用。議
有定數。若操演之時。或因兵施放生疏。欲令多
放數次。則此項鉛藥火繩。須兵自備。因而該管
官恐兵無力。不免草率了事。終於不能純熟。嗣
後概動公費製給。以便多為演習。○十五年議
准。湖廣武昌鎮前後水師二營。地界川江水操
弓箭技有難施。惟烏槍極為便利。照沿邊沿海
省分例。每兵千名。設烏槍四百杆。○二十九年
奏准。王公弓箭數目。親王箭三千枝。弓十張。世

子箭二千五百枝。弓九張。郡王箭二千枝。弓八張。長子箭一千七百枝。弓七張。貝勒箭一千五百枝。弓六張。貝子箭一千枝。弓六張。鎮國公箭七百枝。弓四張。輔國公箭六百枝。弓四張。鎮國將軍箭四百枝。弓二張。輔國將軍箭三百枝。弓二張。奉國將軍箭二百枝。弓二張。奉恩將軍箭一百七十枝。弓二張。○又奏准官員箭數。除武職自一品至六品文職三四品及科道郎中員外等。仍照舊備用外。主事鳴贊六品廕生。七品八品廕監生。照五品官例。各備一百五十枝。筆

帖式照六品官例。各備一百枝。○又奏准。隨圍王公大臣應帶梅針箭枝。親王二百枝。世子一百八十枝。郡王一百六十枝。長子一百四十枝。貝勒一百二十枝。貝子一百枝。鎮國公八十枝。輔國公七十枝。鎮國將軍六十枝。輔國將軍五十枝。奉國將軍四十枝。奉恩將軍三十枝。公八十枝。侯七十枝。伯六十枝。一品官五十枝。二品官四十枝。三品官三十枝。○四十年議准。發往烏魯木齊巴里坤之滿洲蒙古人犯。到配年滿。其無妻子者。派赴南路換防。每名辦給撒袋一

副弓一張。箭三十枝。腰刀一口。○五十六年奏准各省標營額設軍械逾限損壞。如該營尚有存儲贏餘軍械。即照數撥補。毋庸另行製造。仍將撥補之處。詳明該管上司報部備案。並將損壞軍械名目數目。銅鐵斤重。咨部查覈。遇有製造別項器械。准其撓抵應用。○又

諭鐵盔鐵甲。係堅實經久之物。不過於督撫提鎮查閱營伍時偶一穿帶。並不常用。不必定以備製年限。其虎衣虎帽等項。尤為虛設無用。不必定限備整。○嘉慶六年奏定。四川省各州縣額設民壯。揀派十

分之六演習鳥槍。與兵丁等技藝一律純熟。其應給鳥槍。編號存庫。每遇操演之期。赴縣領出。演畢即行繳存。仍令該管上司隨時稽察。如該地方官有濫給領出致滋事端者。據實查叅。交部議處。○七年議准。各省州縣庫存銅鐵器械。各該督撫隨時飭查。如有堪用之件。酌撥就近營汛分別抵用。其不堪應用之物。即著銷鎔變價。將所變價值歸於製造軍器項下應用。仍令五年通行查辦一次。分別估撥。造冊報部查覈。○又議定。新疆屯防處所庫存槍礮。遇有操演

年久損壞炸裂不敷配用者。准該處據實報部。行令該省督撫於各標營贏餘軍器內酌量撥給。交換班官兵帶往補換。其損壞之件。仍交班滿兵丁帶回內地標營辦理。○八年奏准。

陵寢宮門弓箭撒袋。十年更換一次。弓由八旗存儲弓內挑選送部給發。箭由武備院送部給發。其撒袋等項。由工部製造給發。○又定武狀元弓張由八旗存儲弓內咨取給發。箭枝咨行武備院送部給發。其盔甲撒袋鞢帶等項。咨行工部製造。送兵部給發。○十二年定。直省各州縣庫存

一切殘廢銅鐵器械及收繳入官礮位刀槍等項各該督撫隨時飭查如有堪用之件酌撥就近營汛應用其殘廢不堪適用者不准銷鎔變價即將斤重數目移知就近營汛遇有製造軍械之時領取應用並每年年終將移交各營堪用器械件數及存儲殘廢銅鐵斤重分析造冊咨送兵部查數○又定出師官兵支給鍋帳一品官並蒙古王公等台吉連跟役給鍋帳四頂副二三品官二三等台吉連跟役給鍋帳三頂副四五品官四等台吉連跟役給鍋帳二頂副

六品以下官連跟役。給鍋帳一頂。副兵丁四名。鄉勇五名。長夫十名。各合給鍋帳一頂。副隨營總理辦差道府糧務同知通判。知州。知縣。佐雜等官。各照出師官員之例。按品級給予鍋帳。○又定官員兵丁箭數。總督。巡撫。提督。總兵。四百枝。副將。三百五十枝。參將。遊擊。二百五十枝。都司。二百枝。守備。一百五十枝。千總。把總。一百枝。外委。七十枝。馬兵。四十枝。步兵。三十枝。一體自行備造。年底造入軍器冊內。盤查保題。○十三年奏准。棉盔一項。向無庫儲。惟現在庫存棉甲。

原係豫備各旗營官兵領用。烏魯木齊提督所屬。係綠營兵丁。若照咨發給。恐各省綠營俱援例紛紛請領。則動用將完。應毋庸發給。嗣後遇有駐防綠營兵丁應行請領者。即令各該處就近官為製造。○道光三年奏准。西安滿洲營製造長矛鳥槍五百杆及撒袋弓箭等項。○九年奏准。伊犁惠遠城滿洲營撥擡礮五十六尊。於烏槍步甲內挑選二百五十名。常川操演。○又奏准。荊州滿洲營改造擡礮四十位。○又奏准。西安滿洲營舊存殘缺擡槍一百六十根。改鑄

大礮四十位。○十一年奏准。密雲駐防。捐辦排槍四百八十杆。○十二年奏准。添製甘肅省涼州馬兵鳥槍二百杆。莊浪馬兵鳥槍一百杆。○十七年

諭。熱河查圍兵丁。添置長槍。著准其籌款開銷。○又

諭。特依順奏直隸玉田三河昌平順義等四州縣所設官兵。僅止操演馬步箭。俱未設有鳥槍。著准其於密雲駐防原設鑽把拉特鳥槍四百八十杆內。挑選尺寸較長打靶有準者。每處撥給二十杆。發交各該防守尉等承領。令其專習準頭。至密雲操演大陣時。即

由排槍內撥入八十杆。以符原數。○又

諭常德奏江甯副都統所轄八旗礮營。向未設有擡礮。著照所請。如式添造。交八旗礮營兵丁一體操演。○

十八年

諭特依順奏密雲上年添設擡礮。並玉田等四處鳥槍。應需藥鉛等項。著准其添設一年。○又

諭特依順奏密雲旗營。原設腰刀。無裨實用。著准其由京招匠前赴密雲。飭令協領等親視監造。純折鐵長把腰刀四百把。所需白蠟長杆。准其前赴山東採買。四五百根應用。○又奏准甘肅省涼州滿洲營添擡

礮六尊。○十九年

諭布彥泰奏請添設六力官弓改用擡礮一摺。著照所請。張家口駐防滿洲蒙古十旗及獨石口千家店二處。每旗每處。准其添製六力官弓各二張。並准於張家口改設擡礮十位。○又奏准添設甯夏滿洲營擡礮四十位。腰刀四百把。○二十年奏准添製河南省滿洲營擡槍五十杆。○二十一年

諭富呢揚阿奏陝西撫標挑選擡礮三十五位。擡槍十杆。連鎮標擡礮二十五位。擡槍三十杆。共一百杆。委員帶兵管解趕赴浙江軍營。其餘一百杆亦在附近

各營挑選足數。均著照議辦理。惟念陝甘兩省。地處邊陲。軍器甚關緊要。現雖通融撥調。究恐有誤操防。著恩特亨額富呢揚阿。飭屬趕緊製造。以實邊防。所製擡槍。務在便捷利用。著以三十斤為率。不可過於笨重。○又奏准江甯駐防旗營。添造鳥槍二百杆。○

二十五年

諭。岳興阿等奏江甯八旗原設擡礮。不敷應用。續添鳥槍。間形損裂。應添製擡礮四十尊。鳥槍二百八杆。著准其製造。○二十六年

諭。前據穆彰阿等擬定。左右兩翼小九處駐防兵丁。改

演槍矛名數該處應添擡槍二百杆著健銳火器二營發給鳥槍一百八十杆著武備院發給其應添長矛著鄂順安派員採辦白蠟杆二百根交該管大臣分撥各處認真練習○三十年奏准塔爾巴哈台捐造擡礮一百尊○咸豐五年

諭奕興奏烏里雅蘇台添練槍礮與陣式不合徒費火藥著即停止改為操演騎射其科布多地方操演槍礮亦著一律停止○十年

諭札拉芬泰等奏查明應行補造軍裝器械一摺伊犁官兵軍裝器械自道光二十七年查修以後迄今歷

時已久。自應查明修造。惟該處物料不齊。所有應製之鑼鍋腰刀角弓箭枝等件。即著陝甘兩省督撫籌款監造。解交伊犁。○同治十一年

諭彭玉麟片奏請停止水師肄習弓箭。以期專精一技等語。水師所用。本以使槍放礮為優劣。何得藉口演習弓箭。致開陸居之漸。著照所請。所有長江水師及江蘇新改之外海內洋內河水師。均著專習槍礮。毋庸兼習弓箭。該提督隨時操演。及考拔各缺。亦著照舊章辦理。欽此。遵

旨覆准。內河水師。不僅江蘇一省。其直隸湖南湖北浙

江廣東各省設有內河水師人員此後專習槍
斃毋庸兼習弓箭。

欽定大清會典事例卷七百十一

兵部

軍器軍器通例 簡覈軍器 軍器禁令

軍器通例○

國初定軍器由部定式移文工部製造按名給發仍令該管官隨時稽查有損壞者修整補製如有贏餘器械留營以備增補朽敝者悉行銷毀○順治五年定八旗兵丁需用甲冑軍器移文工部製給或給銀令其自製直省兵丁需用鎗仗動支本地錢糧造給報部覈銷其守護

陵寢兵丁。及八旗新滿洲甯古塔新滿洲人等。應給弓箭甲冑等項軍器。該管大員奏准咨部。弓箭由部給發。甲冑等項由部轉行工部造給。○又議准。官弁製造緊急軍器。不依限完竣。以致遲誤者。革職。若遲誤豫備軍器者。降一級調用。○雍正五年。覆准。官兵遇升遷事故。其本人舊有軍器。係動官銀製備者。給予頂補之人。若本人自備者。除官員兵器聽其自便外。兵丁軍器。該管官視其利鈍。酌量定價。給新補之兵。即將新補兵丁名下應領錢糧。陸續扣給原主。○乾隆十

五年

諭八旗官兵器。祇缺少者。均咨部官為造給。器械內弓箭尤為緊要。惟賴不時整理。善為收貯。從前兵部八旗都統會議訓飭八旗官兵將器械善為收貯。曾經奏准施行。今都統等或因日久廢弛。不以為事。亦未可定。著再行傳諭。務遵原奏。留心訓飭稽查。○三十八年議准。出征病故官兵遺失軍器。免其著落家屬賠補。○五十六年奏准。各省軍械有逾應製應修年限。尚屬完固整齊者。毋庸拘泥限期修理。致滋糜費。如有因限期已屆。將完固軍械

冒混請修者。別經發覺。除不准其開銷外。將查驗不實之各上司。及冒混請修各官。一併從重議處。○又奏准。修製軍械。未經完竣。捏報已完者。查出議處。○又奏准。各省標營原設軍械。遇有損壞。詳請督撫提鎮派委大員。令其切實查明。已逾應製應修年分。實在破損者。准其動項修製。或有未屆年限。竟至不堪演用者。如係承辦之員。草率偷減。查明不及定限之半者。責令全行賠補。及半以上者。將原械開銷之價。按其未滿年限。作為分數。勒令賠補。承辦之員。追不

足數。於驗收上司名下追賠。仍各交部分別議處。○又奏准。各省庫儲完好軍器。僅不加謹收儲。未屆年限。竟至不堪演用者。將收藏不慎之員。交部議處。仍將原械開銷之價。按其未滿年限。作為分數。勒令賠補。○又奏准。各省庫儲軍械。未屆年限。破損匿不詳請修製者。該督撫於閱操之時。查明參奏。照例議處。○又奏准。出洋商船。如有在外國置買礮位。防禦盜賊者。進口之時。即開明銅鐵礮位斤重數目。告知守口員弁。前赴有司衙門呈繳。地方官稱驗輕重。酌給

價值存儲局庫。其中有可備用者。發給礮位較少之營分。以供操防。如不堪應用。即將銅鐵斤重數目。移知就近營汛。遇有製造軍械之時。領取應用。仍由該督撫於每年年底。將一年內商船進口。有無呈繳礮位。及呈繳若干。給價若干。查明彙報戶部兵部稽查。○嘉慶七年議准。八旗官兵自備之弓箭撒袋腰刀缺少。情願豫指俸餉製造者。該都統造冊分送該部。照定式製造給予。其工價銀兩。官員於俸銀內作四季扣還。兵丁於錢糧內作十二箇月扣還。俱造入俸

餉冊內咨明戶部坐扣。凡此等自備弓箭撒袋腰刀。如有年久損壞無力修製者。俱准照此例辦理。○又議准八旗兵丁遇有升遷事故。將軍器酌定價值。給予新頂補之人。即將頂補之人應領錢糧。照指餉製造軍器之例。限二十箇月扣還。給付舊兵。○又奏准在京各旗營額設軍械。如例應動用官項銀兩修製。及由工部內務府武備院造辦處鐵匠營支領之件。俱應先期查明原製原修原領年分。造冊報部。由部按例覈准後。再行修製支領。○十二年定。征防官兵

隨帶之夾帳房大涼篷。按八箇月。單帳房小涼
篷。按四箇月。各准其更換十分之五。以次遞加
增換。其隨配帳房之鑼鍋。鍋椿。鍋撐。鐵鉞。鑊頭。
鐵斧。鐮刀。鐵鍛。鐵鋤。鐵錘等項。計及三年。准其
更換一次。換下各項銅鐵。妥為收儲。即將斤重
數目報部查覈。遇有製造軍械之時。即取此項
銅鐵回火抵用。報部開銷。其餘舊料。據實變價。
解交藩庫報撥。甘肅省巡視青海及玉樹等處
會盟。兵丁攜帶之夾帳房。按六次計及十箇月。
單帳房。按三次計及五箇月。各准其更換十分

之五。以次遞加增換。其隨配帳房之鐮鍋鐵鍛。攜帶二十次。計及三年。實有破損。准其貼換。換下各項銅鐵。妥為收儲。即將斤重數目報部。遇有製造軍械之時。即取此項銅鐵回火抵用。報部開銷。其餘舊料。據實變價。解交藩庫報撥。直隸山西甘肅等省兵丁。前往西北兩路新疆換防。攜帶盔甲。三十年製。十五年修。號帽。號袍褂。鐵鍛雨槍套。雨箭罩。雨旗套。雨袍罩。雨刀罩。毛單。水火套。三十年製。十年修。腰刀。鐵斧。烏槍。四十年製。二十年修。旗幟。九龍袋。大藥葫蘆。二十

五年製。十三年修。夾帳房夾帘子。綳子。十六年製。八年修。單帳房單帘子。單綳子。八年製。四年修。木樑。梅花樁。十年製。五年修。隊鼓。十年後如有破損。准其更換。鑼鍋銅鑼。長號。十年後如有破損。准其貼換。行營礮。三十年後實有炸裂。准其鑄造。十五年後口門寬大。准其修理。鈴鐺。十五年更換。風繩。三年更換。銅罐。鐵火筒。斧頭。鎌刀。鐵鍬。鐵鍬頭。鐵杓。鍋樁。令各該省確切查明。如實有損壞。准其隨時修製。水師省分出洋捕盜。用去軍火。及損壞軍裝礮械。准其隨時補

製於各營解司支存公費銀兩內動用。造冊報部查覈。直省各標營遇有應行修製軍裝器械需用銀數在一千兩以上。督撫造冊具題一千兩以下。造冊咨部。兵部均按例覈明。俟覆准之後。方准動項修製請銷。如同一標營同時修製軍裝器械需用銀數在一千兩以上者不在分案咨報。仍照例具題。如不候部文擅自動項

修製報銷者。將承辦轉詳出咨各官。照添建營房率行請銷例議處。○十七年奏准各直省綠營兵丁自備軍械內。弓箭撒袋腰刀。遇有年久損壞無力修製者。准其豫指餉銀製造。由各該

營查明軍械名目件數。詳報督撫造工料清冊。咨部覈准後。即行動項派員製給。其用過工價銀兩。在於兵丁錢糧內作十二箇月扣完。如兵丁遇有事故缺出。將原製軍械給予新頂補之人。其未完工價。即在頂補之人應領錢糧內。照數接算扣抵還項。借動銀款及應扣銀兩。俱令造報戶部查覈。○又奏准。直省八旗駐防營。綠營。修製行軍攜帶軍械。應聽各該省將軍都統。副都統。總督巡撫。酌量緩急。臨時定限辦理。如不依限速完。以致遲誤。將承修承製督修督製。

之員嚴叅。從重議處。修製尋常操演及換防需用各軍械。俟報部覈准後。即令領項興工。如物料工價二百兩以內者。限一月。五百兩以內者。限兩月。一千兩至二千兩以內者。限三月。三千兩至五千兩以內者。限四月。承修官員依限修製。如式完竣。即行詳請將軍都統副都統總督巡撫提督總兵。派委妥員。逐細查驗。造具冊結。將興工完工各日期詳細聲明。以憑稽覈。如不依限完竣者。將承修承製督修督製之員。附叅議處。○又奏准。凡官員製造緊急軍器。不依限

速完遲誤者革職督製官降三級調用。將軍都
統副都統總督巡撫提督總兵降三級留任。若
修製尋常操演及換防需用各軍械貽誤承修
承製官逾違不及一月者免議。一月以上者罰
俸六月。兩月以上者罰俸一年。三月以上者罰
俸二年。四月以上者降一級留任。五月以上者
降一級調用。督修督製之員違限一月以上者
罰俸三月。兩月以上者罰俸六月。三月以上者
罰俸一年。四月以上者罰俸二年。五月以上者
降一級留任。將軍都統副都統總督巡撫提督

總兵。違限一月以上者。免議。兩月以上者。罰俸三月。三月以上者。罰俸六月。四月以上者。罰俸九月。五月以上者。罰俸一年。如承修承製之員。玩視軍儲。將應領之帑。延挨請領者。按其違限月日。照修製逾限例。分別議處。儻該上司故意勒掯。以致遲誤者。將該上司降二級調用。承修承製官免議。○二十一年。奏准。旗綠各營。應修軍械銀數。在一千兩以上。各直省將軍督撫等。先將撥缺帶缺。並添新及逾限各械開明名目件數。原製原修年分。及損壞實在情形。專摺具

奏。俟接准部覆。再行題估題銷。如銀數在一千兩以下。仍照向例造冊咨報兵部。俟覆准後。方准動項修製。

簡覈軍器。○順治五年題准。每年秋季奏請點驗八旗護軍營驍騎營器械。春季奏請點驗前鋒營步軍營器械。令該管官互相稽查。○又定。點驗軍器。若盔甲弓箭等項全無者。係官革職。兵鞭一百。革退。軍器虧缺及箭上無字並書他人姓名者。官罰俸一年。兵鞭五十。軍器朽壞者。官罰俸兩月。兵鞭二十。如所屬官兵有盔甲弓

箭等項全無。及軍器缺少或朽壞者。一名至五名。該管都統等罰俸三月。參領等罰俸六月。六名至十名。都統等罰俸六月。參領等罰俸九月。十名以上者。都統等罰俸九月。參領等罰俸一年。二十名以上者。都統等罰俸一年。參領等降一級留任。三十名以上者。都統等罰俸二年。參領等降一級罰俸一年。至佐領驍騎校等所管兵數無多。有軍器缺額朽壞。一名至三名者。罰俸六月。四名至六名者。罰俸一年。七名至十名者。降一級留任。內府至王公府屬佐領管領下。

有十名以上者。降一級罰俸一年。二十名以上者。降二級留任。○康熙五十六年覆准。廣東沿海設立礮臺。於每年正月九月委就近文職會同該營官弁。每礮演放十餘次。具報總督查覈。○雍正元年奏准。游牧八旗察哈爾官兵軍器。由部越一歲開列滿洲蒙古都統統領副都統職名奏請。

欽點一人前往稽閱。○二年題准。各營收儲大礮鳥槍。隨時演放。毋致銹蝕。○十年議准。直省各營軍裝器械。屬督撫所轄者。督撫委官盤查。提督

所轄者。提督委官盤查。皆取本營並無缺少。及委官並無捏飾印甘各結存案。各於年終彙題一次。至於各鎮有屬督提統轄者。由該鎮委官盤查。取印甘各結。並加具保結。送督提查覈。年終彙題。若無督提統轄。各該鎮委官盤查取結。亦於年終彙題。其彙題之時。各將所屬軍裝器械數目。分析標營造冊。並保結送部查覈。如彙題之後。仍有缺少。將從前盤查之官罰俸六月。督撫提鎮罰俸三月。儻委官明知缺少。扶同捏結。報稱並無缺少者。降三級調用。○又議准。各

營軍裝器械以都守為專管官。副參遊為兼轄官。若無故虧少。經督撫提鎮題參。將專管官罰俸一年。兼轄官罰俸六月。照數分賠。係兼管官查出揭報者免議。止令專管官獨賠。皆限六月賠完。如逾限不完。將專管官住俸。兼管官停升。俟賠完之日開復。若係兵丁缺少。經該管官查出揭報追補足額者免議。至於新舊各官。將軍裝器械限一月交代。如無缺少。新官造冊出結。詳報督撫提鎮年終報部。若交代時舊官推卸不交。新官勒索不受。皆照交代遲延例。分別議

處。至病故官并缺少軍裝器械者。係兼管官病故。著落專管官獨賠。專管官病故。著落兼管官獨賠。儻專管官兼管官一時病故。著落從前未經查出之專兼各官分賠。其缺少各數。果係年久朽壞。出師缺損。及因公動用者。准動公費製備。免其議處分賠。儻有藉端科累兵弁製備者。照因公科斂例議處。○又議准督撫提鎮將營中盔甲弓箭箭鳥槍藤牌刀槍旗幟鍋帳鉛藥鐵棍等項。按照題定額數製備。一有損缺。該管官即詳報隨時修整。准其動用公費。務期齊全足

用。如有贏餘。擇其堪用者存營。以備增補。其朽
敝者酌量銷毀。以免竊賣之弊。○十一年議准。
營中一應軍器。遇有缺損。不按時修整。及修整
而收儲不謹。以致朽爛。或將豫備鐵木等項。堆
儲潮溼地方。以致銹蝕者。將該管官罰俸六月。
仍令照數賠補。○又議准。大礮攻守兼資。必平
時豫備齊全。臨時方能得用。督撫提鎮嚴飭該
管官。將現有大礮建置礮車。加謹蓋藏。以避風
雨潮溼。每年十月間演放一次。以防銹蝕。一有
損壞。詳明動項製造。如本營未備。而別營有餘。

者。通融撥取。若有蓋藏不謹。及遇有損壞並不修整者。將該管官照燒毀軍器例議處。○又議在。營汛兵丁所帶腰刀。該管官不時查驗。遇有損壞。即時修整。如損壞不堪使用。及有白鐵無鋼者。將兵責革。該管官罰俸一年。○乾隆元年議在。修補一應軍械器械。該管官估定價值。呈報該提鎮查無浮冒。在其動用公費銀。修補完日。委官查驗。出結申送提鎮。該提鎮陸續移會布政使司。並詳督撫存案。該營於年終將一營共計公費若干。各項開銷若干。現在若干。逐一

分析造冊送布政使司覈對。儻有浮冒及與提鎮原文舛錯者。駁令覈減更正。仍詳督撫覈參。將造冊官罰俸一年。至於差遣官兵盤費。於公費內動支者。取具各官領狀。亦照此辦理。○四年題准。各省將軍都統副都統。於到任時。將所屬同城本管旗營一應軍裝器械。限兩月委官盤驗。其外屬各營軍裝器械。限三月委官盤驗。各具題一次。仍取具該管官並無虧少印結。及委官並無捏飾印結存案。於年終彙題。仍將所屬各營軍器數目。造冊送部查覈。儻委盤彙題

之後。仍有缺額。別經發覺者。將盤驗之官罰俸六月。將軍等罰俸三月。委官扶同捏結者。降三級調用。○十四年議准。營兵號衣之外。別有應差衣帽。向係坐扣餉銀官辦。尺寸有定。各兵身材不齊。長短不能合式。且雇覓縫人。費用較多。其中不肖官弁隊長。不免扣剋染指。嗣後不必官辦。令兵自行製備。免其坐扣餉銀。該上司不時查驗。務使潔淨整齊。不至缺乏。以肅軍容。○十六年覆准。烏槍為緊要軍器。儻有年久不堪用者。令該管官驗看確實。准其重造。其舊槍鎔

化之鐵。加謹收儲。以備增造各項軍裝之用。○

十八年

諭八旗軍器例應每年特簡王公大臣點驗。但歲一點驗殊覺煩擾。嗣後著三年一次點驗。既寬點驗之限。臨時務宜實心查覈。不得草率了事。若朕親閱時。軍器仍有虧缺損壞者。必將點驗之王公大臣治罪。至點驗之年。將八旗前鋒營護軍營驍騎營內府護軍官兵軍器。仍照例點驗外。其內府佐領下馬甲及王公府屬兵丁軍器。皆停其點驗。○二十一年奏准八旗軍器五年奏請點驗一次。王公等軍器由宗

人府奏請點驗。○四十一年奉

旨。侍衛鑾儀衛。並兩翼前鋒營。圓明園護軍營。健銳營。上三旗包衣護軍營。滿洲火器營。盔甲軍器。俱著交兵部一體奏派王大臣點驗。毋庸自行奏請。○四十六年

諭。三旗侍衛鑾儀衛章京等盔甲。著停其點驗。○又議准。八旗微員兵丁棉甲一萬八千副。收放

東華門樓內。腰刀撒袋各一萬八千口副。箭十八萬枝。收放

端門樓內。仍派內務府官員。於每年四季留心瞭

曬母致溼銹。以備領用。屆點驗時。王大臣就近赴各門樓查驗。○五十二年奉

旨。文職七品以下武職六品以下微員盔甲軍械。嗣後著停其點驗。○嘉慶七年議准。凡提鎮卸事時。將所屬各營一切軍器。註明名色件數原製原修年分。並分別堪用不堪用字樣。造具交代清冊。移送新任提鎮照冊點驗。如果均屬齊全。即加具並無缺少印結。徑行送部。兵部與該督撫年終彙題冊覈對。儻有虧缺。照例議處。所少器械。仍指名著落賠補。○八年議准。健銳營內務府三

旗護軍統領

圓明園八旗內務府三旗官員盔甲。免其點驗。八旗文職三品以下不兼武職人員。並免其製備盔甲。其弓箭箭枝撒袋。仍行點驗。○又奉

旨。兵部議奏查明八旗應行點驗盔甲器械官員。請展期辦理一摺。著照所議行。惟內稱健銳營內務府三旗護軍統領圓明園八旗內務府三旗恭遇大閱。並無執事。各該營官兵均請免其製備盔甲。此則非是。向來健銳各營。雖遇大閱之期。例無應行環甲等事。但營政攸關。一切盔甲。自應如式製備。以壯軍容。若

因各該營官兵不在大閱數內。輒將所用盔甲。竟免製備。殊不足以昭體制。嗣後健銳等營。不過免其點驗。所有盔甲。仍著一體自行製備。至文職三品以下。不兼武職人員。均著免其製備盔甲。○十二年定。出師官兵攜帶軍裝器械。先期咨報兵部備案。於凱撤回營之時。派委文員會同該管將備確切查驗。將帶回堪用之件。儘數歸額。其損壞各件。准其隨時修製。如有浮冒。經部查出。或別經發覺。將查驗及承辦各營員嚴叅議處。○又定。各直省副將參將遊擊都司守備千總等官。接任

交代時。將營中庫存一切軍裝礮械救火器具。並城門堆撥墩汛等處排列各項軍械。各就本管之處。查明交代。陝西甘肅二省督撫提鎮標下中營。俱限四十日交代明白。雲南督標提標。臨元等六鎮。以及貴州提標安義等四鎮。俱限五十日交代明白。其餘各標協營。並江蘇安徽江西山東直隸山西河南浙江福建四川湖南湖北廣東廣西等十四省。俱限一箇月內交代明白。離任官員。取新任官員查收清楚回文。方許起程。接任官員。如已經交盤。並無缺少。造冊

出結。聲明到任交盤清楚各日期。通報總督巡撫提督總兵。專案造冊送部。如交盤之時。舊官推卸玩延。新官勒指隱捏。以及交代遲延。均照交代錢糧盜案例。分別議處。如軍械有缺額殘損者。照軍器缺額及修整器械例。分別議處。賠

補。○十七年奏准在京各旗營。

八旗滿洲蒙古驍騎營。漢軍驍

騎營。鳥槍營。礮營。藤牌營。滿洲蒙古漢軍新營。左右兩翼前鋒營。八旗護軍營。健銳營。火器營。國明圍八旗包衣三旗官兵處。內務府三旗護軍營。前鋒營。新槍營。陳槍營。城內九門。

步軍營及巡捕五營。凡兵丁操演軍裝器械。及守禦救火器具。各該管大臣於每年十月內派

委妥員逐細盤查。如果均屬齊全。取具該管官員並無缺少印結。及委員並無捏飾印結。於十一月內。將各項軍裝器械數目。註明原領原修年分。分營造具漢字細冊並印結。咨送兵部查覈。彙總具題。如有損壞。查明已屆修製定限者。即照例報部修製。其自備者。即飭令自行修製整齊。若未屆定限損壞。及無故缺額者。即責令該管官照例賠補。仍交部議處。儻損壞缺少各械。委員盤驗時未經查出。別經發覺。並扶同結報者。均照例分別議處。○又奏准。各省將軍都

統副都統等於到任時。將所屬同城親標旗營一切軍裝器械。限兩箇月委員盤查。其外屬各旗營一切軍裝器械。限三箇月委員盤查。保題一次。仍取具該管官員並無缺少印結。及委員並無捏飾印結存案。又於每年十月內。將所屬各旗營委員盤查造冊。詳送該將軍都統副都統。於封印前保題。將所屬各旗營一切軍裝器械。及守禦救火器具數目。原製原修年分。分析造冊送部查覈。如任意遲逾。即照造冊遲延例議處。其每年十月以後有收支軍械。即造入下

年題報冊內送部。儻委盤保題之後。仍有缺少。別經發覺者。將從前委查之員。罰俸六月。將軍。都統。副都統。罰俸三月。儻委員明知缺少。扶同捏結。報稱並無缺少者。將缺少本員及委驗之員。各降三級調用。○十八年

諭。各門所備弓箭刀矛。全係飾觀。不堪應用。著兩翼前鋒統領八旗護軍統領。將紫禁城內例設各項軍器。逐一查點。可用者若干。應行修理補造者若干。據實具奏。若遲延推諉。耽閣不辦。自行摘去翎頂。議罪具奏。並著武備院先查明該院現存各項軍器。共有若

干。開單具奏。所有各處軍器殘缺不全者。先將該院現存軍器撥補。再有不敷。動項製造。俟彙齊。交工部等衙門確覈需項若干。發帑飾修。勒限報完。另派大員前往查驗。如有製造不精通。融短缺等弊。必將該管大臣從重治罪。各禁門經朕常時出入。或間一抽驗。察有弊端。該管之員。難逃重譴。○十九年

諭。盔甲一項。原以飾軍容。而昭儀衛。於禦侮折衝實用。尚非所亟。著通飭八旗各大臣官員。將應有者自行修補存貯。免其點驗。○二十三年

諭。八旗軍械。自應勤加點驗。以儆廢弛。向例每屆五年。

點驗一次。歷時較遠。著改為三年。由兵部奏派王大臣點驗一次。○又

諭。紫禁城內外及圓明園各門各堆撥。並八旗堆撥。火班城門偏吉看守公所倉庫各堆撥。腰刀弓箭撒袋長槍。著仿照查閱圈馬之例。每年由兵部奏請欽派大員查驗一次。○道光十九年

諭。盛京兵丁。素稱勁旅。器械尤須堅銳。嗣後每屆三年點驗軍器。著該將軍前期開列將軍五部侍郎及副都統銜名具奏。請旨簡派。○二十二年

諭。現當查驗軍器之年。業經兵部奏派大臣查驗矣。所

有滿洲文武官員軍器。固宜齊備。其八旗及各京營軍器。尤關緊要。著該管大臣認真查驗。如有殘缺及不堪用者。移咨武備院如式製造繕修。以儲軍實。儻仍有未能適用之件。惟該管大臣是問。毋得視為具文。○又

諭盛京官兵軍器。每屆三年。開列將軍副都統五部侍郎銜名。奏請簡派一二員。將各城軍器調至省城。公同點驗。

軍器禁令。○康熙五十五年題准。城上直班官。晝夜私移城上備用火藥者革職。其同班官不

行攔阻者。罰俸一年。○雍正元年奏准。官兵將軍器質當者。官革職。兵鞭一百。革退。軍器追繳入官。失察之該管官。罰俸一年。○二年題准。城上儲火藥屋。步軍統領隨時巡視。有閒人在近行走者。看守官罰俸九月。兵鞭四十。致有疏虞者。看守官革職。兵鞭一百。革退。○又定。兵丁將所領火藥私賣者。革退。交刑部治罪。失察之該管官。罰俸一年。該管大員。罰俸六月。○三年奏准。官儲軍藥。擅行棄毀者。官革職。兵鞭一百。至三百斤以上者。無論官兵。皆革退。交刑部治罪。

若遺失及誤毀無多者。官罰俸一年。兵鞭五十。至三百斤以上者。官降一級。兵鞭八十。其缺少火藥。悉著追賠。○六年定。官兵私賣軍器者。革退交刑部治罪。失察之該管官。罰俸一年。○十一年議准。失火燒毀官兵房屋。盜甲器械等物者。該管官罰俸六月。若因公他出者免議。○乾隆元年議准。民間不許製鳥槍。其鄉邨險僻之處。防虎防盜。鳥槍在所必需。各該省督撫確查各州縣內有實在應用地方。照兵丁鳥槍式樣製造。書整姓名。具呈地方官編號註冊備案。如

非應用地方。有私藏或私造售賣者。將私藏私造之人責四十板。烏槍入官。失察之該管官。罰俸一年。若兵丁有籍稽查烏槍擾害民間者。革糧。該管官罰俸一年。○二十九年奏准。地方有私鑄紅衣等大小礮位者。將礮入官。該犯交刑部議罪。其失察之該管官革職。兼轄官降四級調用。提督總兵降二級留任。○三十九年奏准。鐵礮火器不得擅自私用。如有私藏火礮不行送庫者。將失察之專管官降一級調用。○又奏准。地方有違禁私製藤牌者。該管武職罰俸一

年。○又奏准。看守城池倉庫街道等處。遺失本身器械者。係官降一級留任。兵丁鞭七十。若遺失在官器械者。官員降一級留任。罰俸一年。兵丁鞭八十。○又奏准。私藏火礮及私造鳥槍者。係官革職。兵丁鞭一百革退。火礮鳥槍俱入官。該管兼轄各官。叅處。如有諱飾等情。降二級調用。○又奏准。各省存儲火藥局。該管各官。若不加謹巡防。以致被轟者。將同城專管兼統各官。俱革職留任。不同城之兼統各官。降一級留任。平時防範不嚴之提督總兵。罰俸一年。○嘉慶

四年議准。閩浙沿海各廳州縣民壯。准其演習
鳥槍。會同附近營兵按期操演。福建官製鳥槍
三百八十五杆。浙江官製鳥槍六百六十五杆。
俱整明縣名字號。平時收存庫內。遇操演之期。
方准給發。事畢仍行收存。不許民壯私存在外。
其地非沿海各廳州縣民壯。概不准其演習。○
六年奏准。各省地方。鳥槍不許存留。其湖南省
辰州府屬乾州廳鳳凰廳。永綏廳。辰谿。溆浦。沅
陵。瀘溪。寶慶府屬城步邵陽新化。武岡州。新甯。
沅州府屬芷江。黔陽麻陽。永順府屬永順保靖。

桑植龍山。靖州。並所屬通道綏甯會同。衡州府屬常甯鄧縣。永州府屬零陵。祁陽。東安。道州。甯遠。永明。江華。新田。郴州。並所屬宜章。興甯。桂陽。桂東。桂陽州。並所屬臨武。藍山。甘肅省蘭州府屬循化。河州。西甯府屬巴燕戎格。西甯。碾伯。貴德。鞏昌府屬洮州。岷州。甘州府屬撫彝。張掖。山丹。涼州府屬平番。鎮番。肅州。廣東省廉州府屬合浦。連州屬連山。廣西省桂林府屬靈川。興安。陽朔。永甯。永福。義甯。全州。灌陽。平樂府屬恭城。荔浦。富川。梧州府屬藤縣。容縣。懷縣。潯州府屬

平南。南甯府屬橫州。永淳。新甯。上思。思恩府屬
武緣。賓州。遷江。上林。百色。泗城府屬凌雲。西隆。
西林。鎮安府屬小鎮安。縣今及天保。歸順。奉義。山
西省太原府屬奇嵐州。嵐縣。興縣。平陽府屬臨
汾。洪洞。浮山。岳陽。汾西。吉州。鄉甯。汾州府屬汾
陽。孝義。右樓。永甯。甯鄉。大同府屬大同。渾源。靈
邱。廣靈。豐鎮。廳。朔平府屬朔州。右玉。左雲。甯遠。
廳。澤州府屬鳳臺。陵川。陽城。遼州府屬和順。沁州
屬沁源。武鄉。平定州屬樂平。忻州屬靜樂。代州
屬繁峙。五臺。霍州屬趙城。隰州屬蒲縣。直隸省

承德府屬平泉州。樂平。建昌。豐甯。赤峯。朝陽。四
川省雅州府屬天全。雅安。名山。滎經。蘆山。清溪。
甯遠府屬會理州。西昌。冕甯。鹽源。松潘廳。雜谷。
廳。茂州。汶川。保縣。酉陽州。並所屬秀山。黔江。重
慶府屬璧山。敘州府屬馬邊廳。屏山。雲南省永
昌府順甯府。山東省登州府屬甯海州。河南省
河南府屬登封等處地方。應留烏槍桿衛者。在
照營兵烏槍式製造。刊刻姓名。具呈地方官編
號登冊。至貴州省有必需防禦之舊存烏槍。無
論民苗。亦俱令報官編號。以備稽查。○又奏在

不許存留烏槍地方。如有私藏烏槍。一年內失察一次者。該管官降一級留任。兼轄上司罰俸一年。失察二次者。該管官降一級調用。兼轄上司降一級留任。至准留烏槍地方。如不報官編號。私自收藏者。將不行查出之該管官隨案查參。罰俸一年。○又奏准。官兵汛署。係民間失火延燒。以致燒毀房屋。盔甲器械等物者。該管官仍按向例。燒毀房屋數目。分別議處。房屋盔甲器械。准其動項造補。係該管兵丁汛守處所起火燒毀者。將該管官降一級留任。如係本管衙

署巡防不謹。以致燒毀者。將該管官降一級調用。兵丁治罪。燒毀之房屋。盔甲等項。著落該管官賠補。○又奏准。營中大藥器械存儲庫局。營兵有偷竊私賣等事。將該管員弁革職提問。失察之統轄總兵。降三級調用。提督降一級調用。提督總兵自行查出者免議。○七年

諭。玉德奏營伍操演槍箭。請除去槍上所釘星斗。並請射靶俱改用梅針箭一摺。所奏大屬紕繆。施放鳥槍。全憑槍上所釘星斗為準。若平素演習精熟。自能便捷命中。今玉德因閩浙營兵放槍遲慢手顫。欲將星

斗除去。殊不思兵丁等執槍手顫。自因演習生疏所致。應即將該兵丁等責懲。豈除去星斗。即不手顫乎。至所稱軍營用箭。皆係梅針。營兵操練射靶所用鏢子箭。頭輕翎大。不過架勢飾觀。應改用梅針箭等語。亦不成話。箭枝式樣種種不同。各適於用。其箭鏃翎羽之輕重。總視弓力為準。如射鵠則用鴛頭。射靶則用鏢箭。射牲則用披箭。臨陣則用梅針。隨地異宜。總在發矢有準。如果將鏢箭演習純熟。即易用梅針。必能一律命中。若平日操演。必須改用梅針。方能射賊。則樹侯設正。亦非臨陣時所用。豈有以人為的。竟將

應死罪囚。試演射藝之理。真所謂無知瞽說矣。我朝武備整齊。弓矢槍礮。最為軍營利器。法制精良。百世不易。乃王德輒思改變舊章。此奏若出於提鎮漢員內。已屬不經。况王德係滿洲總督。竟於本朝武備成法。懵然不知。率議更張。尤為謬妄。王德著拔去花翎。傳旨嚴行申飭。仍交部議處。嗣後八旗各營伍及督撫提鎮等。惟當將各營官兵勤加訓練。以期技藝嫻熟。悉成勁旅。毋得妄逞臆見。輕改舊制。○八年奉

旨。兵部議奏。韋陀保請將圍場兵丁所存鳥槍。查出貯公。並令各地方官於附近鄉莊查收鳥槍等因一摺。

八旗兵丁。有操演巡防之責。所用鳥槍。皆係官為製給。若防其偷打牲畜。遂爾概行收貯。勢必不能勤加習練。技藝生疏。殊屬因噎廢食。設有兵丁用箭偶射鹿隻。即將各營制所備弓箭。全行收繳。有是理耶。至民間私藏鳥槍。原干例禁。而附近山林邨莊。其居民或製備鳥槍以防猛獸。或藉禦暴客。定例報官編號。准其留用。此時因嚴禁民人偷鹿。即將伊等所用鳥槍。儘數查收。而蒙古等皆以鳥槍打牲為業。萬一居民向其借用。又安能將蒙古所用鳥槍。逐一查禁乎。是欲杜偷鹿之弊。惟在嚴查圍場附近地方。毋許開

設店鋪收買茸角等項。使不能寄迹消贓。姦民無利可圖。可不禁而自絕矣。所有查收八旗兵丁鳥槍。著韋陀保即行發還。俾資操習巡防。○十年

諭。據那彥成等奏。餉渡船隻。願准攜帶鳥槍。以資禦盜。而護商旅一摺。此項餉渡船隻。載送客商餉貨。取道內洋海面。自應准其攜帶鳥槍。俾資捍衛。著照該督等所請。即照出洋商船之例。每船酌給編號鳥槍四杆。每次酌給火藥三斤。其應如何編號稽查之處。著該督等悉心妥議。章程具奏。○十一年

諭。德楞泰等奏。酌議陝甘各標營。於弓箭兵內挑十分

之二兼令習矛。製造丈尺有定。不得過長等語。一摺。營伍軍器。以弓箭鳥槍為重。必當操演精熟。以昭武備。至長矛一項。止係挑刀藤牌雜技中之一。前因河北鎮總兵蔡鼎奏。請於弓箭兵丁內酌派十分之二。兼習長矛。曾諭令各省營制。酌定額兵演習。因思長矛究非營伍要緊技藝。兵丁於弓箭鳥槍外。兼習其技。以資擊刺。原無不可。若因練習長矛。於弓箭鳥槍轉致生疏。殊屬輕重失宜。非所以飭戎器而講武藝也。且矛杆過長。於運用不靈。尤不足資擊刺。若云深林密箐。長矛較為便利。則更無此理。嗣後各省營制。

訓練卒伍。總當以操練弓箭烏槍為正技。長矛止可令其兼習。兼著於額兵內止酌定十分之一。不許過額。其製造矛杆不得過一丈。如有違式製用者。經該管大員查出。即嚴行懲治。並將該將領一併叅處。○十二年定。直省各標營廢槍廢礮及一切火器。皆係精熟銅鐵。報部存案。妥為收儲。不准變價。遇有製造軍器之時。即取此項銅鐵回火抵用。報部開銷。○十四年

諭松筠奏查閱甘涼肅提鎮營伍一摺。據稱初閱安西玉門營員演箭布靶過寬。較射易中。遂飭傳各營照

依京營布靶成式改制等語。各營布靶自有定制。若過於高寬。則弁兵等命中甚易。又安能技藝精純。松筠為整飭營伍起見。所辦甚是。嗣後著各該將軍督撫提鎮。於所屬各營。照依京營布靶一體製辦。隨時演習。如再有擅用高寬布靶者。著查明參奏。照違制例議處。○十五年定。各省營中演箭布靶式樣。高四尺七寸。寬一尺。有擅用高寬布靶者。查明參奏。

照違制例議處。○道光八年

諭。前據奕訥等奏。奉天旗民私藏鳥槍。應立限赴官呈繳。並請飭吉林將軍一體照辦。朕以該處近年流寓

民人甚多。往往私藏鳥槍。偷打牲畜。自應嚴行查繳。至旗人操演技藝。豈得因流民有偷打牲畜之事。並將旗人所用鳥槍。一概禁止。當經降旨令奕訢博啟圖等。會同妥議章程。茲據奏八旗滿洲蒙古漢軍及正身旗丁學習武備。原不在禁止之列。奕訢等前奏未經聲敘明晰。其各邊門額設兵丁。如有自備鳥槍守禦者。亦可酌留。惟八旗兵丁所用鳥槍。查明數目。整刻旗佐花名。編號註冊。如有損壞。報明該管官發給執照。持赴槍鑪銷毀。照式更換等語。旗丁操演鳥槍。總以勤加訓練為重。若均須持照赴鑪打造。槍上

整刻旗佐花名。徒滋紛擾。必致將操演廢弛。豈不因噎廢食。所奏著毋庸議。該將軍等當嚴飭該管官於圍場漫山一帶認真稽查。如有越邊偷打牲畜者。拏獲治罪。仍隨時密派員弁訪查。儻該管官並不實力查禁。及得賄縱放諸弊。即當嚴行叅辦。至所奏雜項壯丁。與正身旗人不同。所有私藏鳥槍。自應與民人一律禁止。著自奉旨之日為始。予限半年。凡土著流民及雜項壯丁等私藏鳥槍。一概赴官呈繳。給予例價銀兩。盛京由漫餘銀內動支。吉林於稅銀內撥給。覈實報銷。